

KEREKE YA LUTERE MO BORWA JWA AFRIKA

50/2015 Thero ka Sontaga wa 18 morago ga moletlo wa Trinitate, e le ka 04. 10. 2015

Mo leineng la Modimo o e leng Rara le Morwa le Mowa o o Boitshepoe!

Lefoko le le okamelang bekeng eno, le kwadilwe mo go 1 Joh. 4:21, le re: **"Yo o ratang Modimo a a rate le mowrwa-Rraagwe."**

1. Sefela sa 268 - 250/259

2. Thapelo: Morena Modimo wa rona, Jesu Keresete, rona baleofi ba khumanego re bontshiwa ka molao wa gago gore re na le molato fa pele ga gago, le fa go ntse jalo, re leboga thata, gonne o re neile le lona Lefoko la Efangele, le e leng Lefoko la kgomotso ya gore wena wa tla, wa re swela, wa fenywa molao ka go o diragatsa mo boemong jwa rona, wa diragatsa lorato lotlhe lwa gago mo sefapaanong mo boemong jwa rona, o re fe Mowa wa gago gore re ipone molato wa rona ka ntlha ya boleo, re be re bone le boitshwarelo ka wena, re go rate, re go ikanye wena o le wesi, Morepholosi. Amen.

3. Lefoko la Testamente e kgologolo le kwadilwe mo go Ekes. 20:1-17;

Epistolo ka fa thulaganyong ya 2 e kwadilwe mo go Baroma 14:17-19;

Efangele ka fa thulaganyong ya 3 e kwadilwe mo go Mareko 10:17-27.

4. A go ipolelwe tumelo ya bokeresete!

5. Sefela sa 173 - 156/162

6. Thapelo ya mmadi wa thero.

7. Efangele ka fa thulaganyong ya 1 e kwadilwe mo go Mareko 12:28-34, e re: "Foo mongwe wa baitse-dikwalo a tla, a ba utlwa ba botsanya, mme ka a lemoga gore o ba arabile sentle, a mmotsa a re: 'Taolo e kgolo mo go tsotlhe ke efe?' Jesu a mo araba a re: 'E kgolo ke e: 'Utlwa, wena Iseraele! Morena, Modimo wa rona, ke Morena a le esi fela; o rate Morena, Modimo wa gago, ka pelo yotlhe le ka mowa otlhe le ka thaloganyo yotlhe le ka thata yotlhe ya gago. Ke yona taolo ya ntlha.' Ya bobedi ke e: 'Rata mongwe-ka-wena, jaaka o ithata.' Ga go na taolo epe e sele e e fetang tse.' Moitse-dikwalo a mo raya a re: 'Ruri, Moruti, o buile sentle; gonne Modimo o mongwe fela, mme ga go ope o sele, fa e se ona. Le go o rata ka pelo yotlhe le ka thaloganyo yotlhe le ka thata yotlhe, le motho go

rata mongwe-ka-ene, jaaka a ithata, ke mo go gaisang ditlhabelo tsa phiso le ditlhabelo tsotlhe.' Ya re Jesu a bona, fa a arabile ka tthaloganyo, a mo raya a re: 'Ga o kgakala le puso ya Modimo.' Mme ga bo go sa tthole go le ope yo o betang pelo go mmotsa." Amen.

8. Thero: Phuthego e e rategang mo Moreneng wa rona Jesu Keresete, Efangele ya kajeno e re ruta ka ga taolo ya ntlha, mme gore re tthaloganye sentle kgang eo, re e utlwe, re tshwanetse go bua pele ka ga baba ba ga Jesu ba ba neng ba mo tthasela, ba mo leka ka diteko tse tharo. Go ne go na ditlhopho tse pedi tse di neng di sa utlwane, bafarisi le basadukai. Ba ne ba sa utlwane, mme fa ba ne ba leka go tshwara Jesu, ba ne ba tla go Jesu mmogo, ba utlwana go mo tshwara, ba leka go raela Jesu gore a ipofe ka mafoko a a ka mo latlang fa pele ga ba mmuso, ba botsa ka ga lekgetho, ba re: A ke tshwanelo go kgethela Kaisara? Jesu a itse boitimokanyo jwa bone, a ba raya a re: "Lo nthaelelang?" Ka go ba bontsha setshwantsho sa ga kaisara mo leding la lekgetho a ba raya, a re: "Ntshetsang kaisara tse e leng tsa kaisara le Modimo tse e leng tsa Modimo." Ke fa ba nyatsega. Ke gore ba direle Modimo ka tsa ona, ba direle kaisara ka tsa gagwe, mme go obamela Modimo fela, ona o le osi. Ke fa ga tla basadukai, ba leka go konopela Jesu ka potso malebana le tsogo ya baswi. Le bone ba ganeditse ke Jesu, a ba bolelela ka thanolo, fa e le teng, a ba raya a re: Mo go Moše Modimo ke Modimo wa ga Aborahame, Modimo wa ga Isaka, Modimo wa ga Jakobe, a re: Modimo ga se wa baswi, ke wa baphedi. Le fa ba ne ba ititaya sefuba, ba ikgantsha, ba re: Ba itse Dikwalo, go ne go bonala gore ba ne ba sa di itse, kgotsa bogolo re re: Ba ne ba sa di ikokobeletse gore ba di amogele, di ba rute tota, di ba gogele mo boammaaruring. Kana baitse-dikwalo bale le bafarisi ba ne ba na le melaonyana e le mentsi fa thoko e e neng e se na kotsi, le fa motho a e tlodile. Kana go na le molao o o gaisang yotlhe e mengwe, o o tshwanetseng go tshegediwa. Ke kotsi, fa motho a o tlola. Ke ka ntlha ya moo moitse-dikwalo mongwe a tla go Jesu, a mmotsa, a re: "Taolo e kgolo mo go tsotlhe ke efe?" O mogolo mo go yotlhe ke ofe? Jesu a mo araba, a re: "E kgolo ke e: '**Utlwa, wena Iseraele! Morena, Modimo wa rona, ke Morena a le esi fela!**'"

Legodimo le lefatshe di tlhodilwe ke Morena a le mongwe. Ga go na ope yo o mo thusitseng, yo o ka bong a kopilwe gore a atamele go thusa, gongwe go mo gakolola. Mo go botlhe ba ba ka bong ba le teng, gongwe mo go bone ba ba tsenyang dikakanyo tsa bone mo kgannyeng ya ttholego, gongwe ba ba lelang go supa thuso e nngwe fano, ga ba

thuse sepe. Ke gona Jesu a laolang, a re: Morena yoo yo dilo tsotlhe di leng teng ka ene, a re mo rateng "ka pelo yotlhe le ka mowa otlhe le ka tlhaloganyo yotlhe le ka thata yotlhe ya" rona. Ke gore o tshwanetse go rata Modimo, gonne o go dirile, wa ba wa go direla ka tse dintsi tse dingwe tse di go thusang mo moweng wa gago gore o nne le mowa o o ngapareleng Modimo, o se timele ka ona. Wa newa le tlhaloganyo ke ona, le thata le nonofo ya gago. O sona se o leng sona ka ona. Mme jaanong ka tsona tse o di neilweng ke ona o a senya, o baya Modimo wa gago fa thoko, o a ikgalaletsa, o a ikgodisa, wa re: O sona se o leng sona ka nonofo le thata ya gago. Fa o dirisa mmu, o ungwa sentle, ke fa o ikgantsha wena, wa re: O kgonne ka bowena. Ke fa o sa rate Modimo wa gago. Gopola gore ka mmu ole o o kgonneng ka ona gore o nne le maungo a a rileng, o dirilwe ke ona mmogo le wena! Re tshwanetse go ipolela mmogo le Luthere, mmogo le kereke ya Lutere mo bofelong jwa tlhaloso ya artikele ya ntlha malebana le tlholego, re re: "Ke ka moo ke tshwanetseng go mo leboga le go mo tumisa le go mo direla le go mo utlwa."

Jesu a re: "Ya bobedi ke e: 'Rata mongwe-ka-wena, jaaka o ithata.'" Fa a bua ka ga mongwe-ka-wena, go rewa motho mongwe le mongwe, le fa e le wa losika lofe, ke re: le mmaba wa gago tota. O mo rate. Ke mokaulengwe wa gago, ke mongwe-ka-wena, o mo rate, gonne o tlhodilwe ke Modimo, le ene o teng ka ona. Jesu o beile fa thoko melaonyana yotlhe e e neng ya balwa ke baitse-dikwalo le bafarisai. Mme ka ga tsona ditaolo tse some tse ba kajeno ba buang ka ga tsona gore le tsona di latlhlilwe ke Jesu, o di kopantse le yona melaonyana ya Bafarisai, re a mo utlwa gore ga a fokotse sepe mo go tsona, le e seng go di tlosa, mme o di lotsa sentle gore di tlhabe tota, di utlwale sentle, o a di tshwaraganya, o di akaretse ka fa tlase ga taolo ya lorato, a re: Rata Modimo ka bowena jotlhe jwa gago, rata mokaulengwe, mongwe-ka-wena ka bowena jotlhe jwa gago! Ke teng, gonne Modimo o nthatile le nna. A ke rate mongwe-ka-nna, ke gopole gore yo o leng teng mmogo le nna o teng, gonne Modimo o mo ratile jaaka nna. Kana ke tlhoelang ene yo Modimo o mo ratang mmogo le nna? Seo se ka bo se sa tshwanela. Le segakolodi sa rona se re latlha mo go tseo. Go tshwana le seo sa go baya pelo ya rona mo go tsona tse di tlhodilweng ke Modimo gore tsona di re thuse, di re direle, fa motho a baya boikanyo jotlhe jwa gagwe mo go tsotlhe tseo. Ke fa a di direla. Fa e le tse di utlwang, e le tse di akanyang, e le tse di lelang, di tla re latofatsa mo Modiring wa rona, gonne ke bofofu jo bo maswe, bo dirwa ke go latlhegelwa ke Modimo. Moengele o ne a lemosa Johane, fa a ne a batla go mo khubamela, Tshenolo 19:10; 22:8-9, gore a se ka a dira jalo, a obamele Modimo. **Gonne**

Morena ke a le mongwe fela, ga go na yo mongwe, ke ene yo e leng Modiri wa rona rotlhe.

Moitse-dikwalo o ne a amogela ka botlalo thuto le tthaloso ya ga Jesu, a re: "Ruri, Moruti, o buile sentle; gonne Modimo o mongwe fela, mme ga go ope o sele, fa e se ona. Le go o rata ka pelo yotlhe le ka tthaloganyo yotlhe le ka thata yotlhe, le motho go rata mongwe-ka-ene jaaka a ithata, ke mo go gaisang ditlhabelo tsa phiso le ditlhabelo tsotlhe." "Ya re Jesu a bona, fa a arabile ka tthaloganyo, a mo raya a re: 'Ga o kgakala le puso ya Modimo.'" Le rona re ntsha dikabelo, re dira ditlhabelo ka go itshwenyegela, ka go itumela, gongwe ka go leboga re di direla ba bangwe. Mme tseo ka botsona ga di supe go ba thusa ba bangwe bao, le e seng go ba rata, mme gantsi re a di dira gore re tlotliwe, re nne le tlotlo, re nne le moriti, re obamelwe. Tseo ga se go rata mongwe-ka-rona. Ga se tsa sepe, fa o di

A rona rotlhe re ipolele ka boammaaruri gore re paletswe ke go tshegetsatsa thato ya Modimo, re ole mo go yona, ga re a kgona go e tshegetsatsa, re ipolele gore Jesu Morena, molao wa gago o molemo, o siame, ke wa boammaaruri, re gaise moitse-dikwalo, re botse, re re: Morena re tshwanetse go dirang, gonne molao wa gago o a re palela, le fa re ikaya, re re: Re gaufi le puso ya gago, re amogetswe mo go yona ka kolobetso wa rona, re utlwe se Jesu a se buang, a re: Tla mo go nna wena yo o tshwenyegang ka maleo a gago, yo o sa a rateng, yo o ratang tse di molemo. Bosula jo re bo dirang ga re bo rate. Jesu o ikanyegile, gonne ke ene yo o nang le lorato lwa go rata batho botlhe. A rapelela baleofi, ke raya le baba ba gagwe mo ponatshegong. Fa re itumelela tiro ya gagwe gore e nne ya rona ka tumelo, gonne molao wa Mowa wa bophelo jo bo mo go Keresete Jesu o tla re golola mo molaong wa boleole le wa loso, gonne Jesu ga a ka a tla go bofolola molao, le e seng go o dirolola, mme o tlile go o dirafatsa. "Gonne se se reteletseng molao, ka o se na thata ka ntlha ya nama, Modimo o se dirile, wa athola boleole mo nameng ka go roma Morwaaona mo tshwanong ya nama ya boleole le ka ntlha ya boleole gore tshiamo e e batlwang ke molao e dirafale mo go rona ba re sa tsamaeng ka fa nameng, mme e le ka fa moweng," Baroma 8:3.

A Morena o re thuse gore re tsamaye ka Mowa, re o sale morago, ona o re ise mo go Keresete Jesu, re lemoge maleole a rona, re tshabele mo go Keresete, re tshabele mo

bopelotlhomoging jwa gagwe, gonne "ga go na katlholo ya tatlho epe mo go bone ba ba mo go Keresete Jesu." Amen.

9. Thapelo: Morena Modimo, re lebogela Lefoko la gago le le re bontshang boseng-sepe jwa rona. Re a leboga, ka o re rometse Morwao yo o rategang, yo o re fenyeditseng tsotlhe tse re di fenyang, wa re direla, wa re baakanyetsa tsotlhe ka ene. Mowa o o Boitshepo, o re thuse ka metlha ka Efangele ya gago, o re ise mo go Keresete, o re tshegetse, o re bolokele mo boammaaruring jwa Efangele, re se kgaogane le bopelotlhomogi jwa gago, re nnele ruri mo go jona. Amen.

Thapelo ya Morena: Rara wa rona yo o mo legodimong ...

10. Sefela sa 171 - 154/159

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke A. N. Ntuli, ka ngwaga wa 1997, ya ronngwa le ka /2003/2009

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.